

## **Pledpierla - la concorrenza da scriver e'l process da scriver**

### *Ün'unitè d'instrucziun cul **scriver i'l focus tenor il Plaun d'instrucziun 21***

*Pledpierla* – fer pierler ils peds, que d'eira il böt da l'unitè d'instrucziun chi ho gieu **i'l focus il process da scriver**. Nos böt eira dad avair pront ils texts per la fin da marz per pudair trametter quels a la **concorrenza da scriver Pledpierla**. L'occorrenza Pledpierla es gnida realisada la prüma vouta avaint passa 20 ans da l'Uniun dals Grischs e vain organisada hoz da tuot la Lia Rumantscha scu concorrenza Plema d'Aur/Pledpierla. Il tema da la concorrenza da scriver da quist an es *Üna bes-cha raquinta da sia vita*.



*Duonna Romana Ganzoni es steda in visita tar la 3a – 6evla classa ed ho do tschegns grandius e tips prezius. Diversas idejas pels texts sun naschidas eir grazcha quista visita. Per quista fotografia ho duonna Romana miss d'vart be cuort sia mascrina.*

Daspö cha la concorrenza da scriver es gnida invieda, es **mincha vouta gnieu premio** eir l'ün u l'oter text d'ün S-chanfigner u d'üna S-chanfignra. Ans gratagia que eir quist an? La **premiaziun** da la concorrenza da scriver **Pledpierla** ho lö in **marculdi, ils 2 gën 2021**.

Düraunt püssas eivnas es scriver sto i'l center da nossas lecziuns da rumauntsch. L'unitè elavureda as basa als pass da scriver tenor il **Plaun d'instrucziun 21** e faro part al nouv mez da rumauntsch *Mediomatix* da la 5evla classa. Ils pass da scriver sun:

**chatter idejas** ⇒ **planiser** ⇒ **formuler** ⇒ **surlavurer** (cuntgnieu, stil e fuorma) ⇒ **preschanter** ⇒ **valüter** ed **evaluer**

Tschegns e tips haun ils scolars e las scolaras survgnieu eir dad **audios da ses scriptuors e scripturas** da differentis idioms rumauntschs. Quists audios haun ils ses scriptuors registro bel ed aposta per l'unitè da scriver.

Da nossa valleda ladina haun **Göri Klainguti**, **Rut Plouda** e **Romana Ganzoni** registro ün audio cun lur tips a regard il scriver. Al cumanzamaint da favrer es duonna Romana perfin gnida persunelmaing in nossa scoula.

Düraunt l'unitèd da scriver es gnieu a pled eir il **narratur engiadinais *Cla Biert*** ill'emischion *Co ch'eu fetsch ün'istorgia*.

A la fin haun ils scolars e las scolaras pudieu profiter dad ün filmin da l'**actur professionel *Lorenzo Polin***, chi'ls ho dos ün pêr tips e tschegns per üna buna prelecziun e declaro cu cha's possa preparar la prelecziun.

**Aunz las vacanzas** da sted Als vulessans gurent **preschanter noss texts** – in üna fuorma u l'otra. Decisiv es eir cò – scu bod dapertuot pel mumaint – cu cha la situaziun actuela cul virus as sviluppa. In tuots cas **meritan tuot ils texts** da noss scolars da la 3a fin 6vla classa **da gnir preschantos** ad ün public. Ils texts sbuorflan da bunas idejas, da fantasia, da parts fich umoristicas e satiricas, ma eir da scenas extrem tragicas e d'üna lingua viva e fras-cha scu cha chattainsa per furtüna auncha tar noss S-chanfigners. Ed a sun **texts elavuros, glimos, perfecziunos**.

**Romana Ganzoni (1967):**

*Cu as s-chaffescha ün bun text? Eau craj cha's stögla in prüma lingia scriver sü tuot que cha's voul dir e zieva in ün seguond pass – quel es importantischem – cumainza que cha's nomna in inglais editing (=elavuraziun), surlavurer ed elavurer il text e ler üna seguonda vouta e terza vouta, stricher davent que chi'd es memma e metter tiers que cha'l text drouva auncha. Pü cha's fo e megl der cha's dvainta. Que es cun tuot uschè.*

Eau d'he propi plaschair da la concorrenza da scriver Pledpierla, uschè poust propi viver tia creativited!

*Simon Gabriel*

Per mieu text d'he eau tschernieu la muos-cha, perche cha las sairas vegnan quistas muos-chas e't seccan adüna inavaunt, cur cha voust avoir tieu pos.

*Mirta Bott*

Que m'ho plaschieu da pudair scriver ün'istorgia cun l'egna imaginaziun e nossa creativited.

*Carmina Neves*

Per chatter idejas vains nus elavuro üna schurma da fögls e vainsa survgnieu tips da profis. Ad ho do bgera lavur da preparar mi'istorgia da la muntanella impraschuneda. Ma ad ho valieu la paina ed eau sun uossa propi cuntaint cun mi'istorgia e cun mia prestaziun!

*Flurin Thoma*

Eau d'he chatto l'ideja per mieu text cun elavurer ils differents fögls da l'unitèd d'instrucziun, cun ler las infurmaziuns e culs audios e'l film. Ils fögls cha duonn'Elvira ho preparo per nus, m'haun güdo fich bain. Eau d'he scrit ün'istorgia d'ün chaun vegl e chastör.

*Jade Bernasconi*

Pledpierla es tenor me üna bun'invenziun. Cun scriver as schlargia il pledari e tü poust lascher girer tia fantasia.

*Giulia Pietrogiovanna*

A fo sen da's participar a la concorrenza da scriver Pledpierla. Uschè cumainzan eir già ils pitschens a scriver vi dal computer. Cha'ls megl ders texts vegnan premios, am pera eir bun.

*Maja Meng*

Que m'ho plaschieu da pudair scriver l'istorgia.

*Romina Viletta*

Que m'ho plaschieu fich bain da scriver ün'istorgia d'üna muos-cha.

*Gian Andri Feuerstein*



*Cha scriver es üna lavur fich intensiva chi fo eir süjer qualvoutas, haun bado ils scolars e las scolaras cun scriver lur texts e'ls elavurer minuzchusamaing.*

A d'eira fich interessant quantas parts cha's po amegldrer vi d'ün text. Que m'ho plaschieu fich bain. Eau d'he elavuro frastas cumplichedas e las d'he pruvo da scriver in möd pü inclegiantaivel, uschè cha'l lectur e la lectura inclegia eir il sen. Quel chi legia vess da badair, scha que as tratta d'ün text trist u divertent.

*Jodie Sobeck*

Nus vains fat fich bgers exercizis per chatter idejas per ün text. Grazcha a quels exercizis d'heja gieu l'ideja da scriver d'ün'aivla chi observa che chi capita in vschinauncha. Nus vains eir fat ün skelet da l'istorgia aunz cu scriver. Cun tuot ils fögls da lavur d'he eau chatto bunas idejas.

*Felici Defila*

Elavurer il text nu d'eira uschè simpel, ma duonn'Elvira m'ho güdo. Nus vains let tres tuot il text e zieva vainsa cumanzo a stricher frastas e parts chi nu faivan dabsögn u baratto ün u l'oter pled chi nu s'affaiva auncha taunt bain.

*Soraya Vicente*

Que am pera fich flot cha que do üna concorrenza da scriver. Que güda eir da mantgnair nossa bella lingua rumauntscha.

*Lina Salzgeber*

Nus vains fat bgers exercizis. L'ideja da l'aragnun d'heja gieu però già aunz. Ils exercizis ans haun güdo da scriver e perfecziuner noss texts per Pledpierla.

*Gian Andrea Caratsch*

In gruppa vainsa discuto noss texts e'ls oters t'haun dit che cha pudessast forsa auncha müder vi da tieu text. Que cha vulaivans, vainsa alura müdo. Que m'ho plaschieu da scriver il text.

*Jan Christian Pinggera*

L'ideja da fer üna concorrenza da scriver am pera fich buna, que m'ho plaschieu fich bain da pudair scriver l'istorgia.

*Romana Lechthaler*